

Fundacion Respetami

Hopi caso di abuso di mucha ta wordo denuncia pa aña

ORANJESTAD - Hopi caso di abuso di mucha ta wordo denuncia pa aña. Esaki ta segun informacionnan compila di Fundacion Respetami.

negligencia di mucha por pasa tur caminda. Negligencia no conoce rasa, ni nacionalidad, ni religion, ni grupo social.

Abuso di mucha hopi biaha ta wordo relaciona cu abuso sexual. Negligencia ta ora un mayor of e persona responsable pa e mucha no ta haciendo of cumpliendo cu cosnan cu ta su responsabilidad manera mayor.

Negligencia di mucha
Negligencia di mucha y abuso di mucha ta dos cos diferente,

pero hopi biaha e resultado di negligencia y abuso ta un persona cu trauma cu dificultad pa funciona den sociedad.

Negligencia fisico

E forma nan principal di negligencia manera: negligencia fisico esaki ta esun mas facil pa reconoce tambe. Ehempel nan di negligencia fisico ta abandono, esaki kieren laga e mucha sin algun arreglo haci pa su cuidu. Tambe ta topa cu muchanan cu ta wordo laga sin supervision pa oranan largo of ta laga muchanan bou supervision Laga e mucha sin cuidu medico ora tin mester. Consecuencianan di negligencia fisico ta cu e mucha constantemente ta core peligro di haya lesion tambe e

muchanan por keda sin crece bon, sufri falta di nutricion. Den algun casonan muchanan ta te hasta core bay for di cas.

Negligencia emocional

Negligencia emocional ta kisas esun mas dañino di tur. Negligencia emocional ta ora cu frecuentemente ta laga e mucha sin atencion, sin sosten sin amor of cariño.

Ora e mayor ta rechasa busca ayudo adecua pa e mucha. Esaki por tin como consecuencia, inseguridad, un mal imagen propio y un comportamiento destructivo. Tambe por topa cu muchanan cu a abusa di alcohol of droga. Un mucha cu a wordo emocionalmente negligisha crece y bira

un mayor cu por negligisha su yiunan tambe.

Negligencia educacional

Negligencia educacional ta ora e mucha ta falta scol continuamente y e mayor no ta trata di coregi esaki. Tambe ora e mayor ta lubida di inscribi e mucha na scol y e mucha ta caba na ta ausente hopi mas na scol. Ora ta nenga e mucha bijles of otro tipo di ayudo. Consecuencianan di negligencia educacional ta cu muchanan por perde interes pa scol, bira demotiva of stop di bay scol completamente.

Comprension pa mayor

No ta den tur situacion negligencia ta algo cu ta wordo

haci intencionalmente, hopi biaha mayornan simplemente no sa con pa ta un bon mayor of ta insegur di nan habilidad. Tin ora mayornan tin problemanan financiero, bida diario yena cu stress, mayornan tin cu lucha pa duna e mucha cuminda y paña. Hopi biaha e mayor mester ayudo y ora no ta haya esaki ta opta pa baha stress riba e mucha. Problema emocional di e mayor tambe ta hunga un rol, si un mayor tin un imagen propio cu ta malo, combina cu falta di apoyo di famia, amigo y comunidad por conduci na un mayor cu ta deprimi. Tin ora mayornan ta abusa di droga y alcohol y esaki ta limita nan habilidad di ta un bon mayor pa nan yiunan. □